

142 *Relation de la Nouvelle France*

ie ſçay bien qu'on vous fera long-temps demander le Baptême, pour la crainte qu'on a que vous ne vous mariez à quelque Infidele, mais ie penſe auoir aſſez d'authorité ſur vous pour empêcher ce coup.

L'inconſtance des mariages, & la facilité de ſe repudier les vns les autres, ſont vn grand obſtacle à la Foy de Ieſus-Chriſt; on n'oſe baptiſer les ieunes gens, quoy qu'ils ſoient tres-bien diſpoſez, pource que l'experience nous apprend que la couſtume de quitter vne femme ou vn mary ſaſcheux, eſt puiffante. Vne bonne femme auoit vne fille âgée d'environ quinze ans; la fille eſtoit mieux inſtruite que la mere, pource qu'elle auoit plus de memoire. Le Pere donna le Baptême à la mere, & le refuſa à la fille; mais c'eſtoit choſe agreable de voir la fille ſeruir quaſi de Maraine à ſa mere; car cette bonne vieille ne ſe ſouuenoit quaſi plus des réponſes qu'elle deuoit faire. Sa fille luy ſuggeroit avec vne grande ioye de voir ſa mere Chreſtienne, & vne triſteſſe d'eſtre priuée du meſme bon heur. Cette bonne femme eſtant baptiſée diſoit à ſa fille, quand elle ne pouuoit aſſiſter à la Meſſe pour ſes inſir-